

Siku Blocki malillugu nunatsinni sanaartornermut atugassatut pilersitsisoqarsinnaanera, taamaaliornikkut nunatsinni illuliornerup aningaasatigut imminut nammassinnaasumik ingerlanissaanut ilapittuutinngorlugu periarfissiuunnissaa pillugu Naalakkersuisut UKA2022-mi nassuiaammik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Agathe Fontain, Inuit Ataqatigiit)

pillugu

Sanaartornermut Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Sanaartornermut Ataatsimiititaliap suliarinninnermini ilaasortarai:

Inatsisartunut ilaasortaq Kristian Jeremiassen, Inuit Ataqatigiit, Siulittaasoq

Inatsisartunut ilaasortaq Anders Olsen, Siumut, Siulittaasup tullia

Inatsisartunut ilaasortaq Charlotte Pike, Inuit Ataqatigiit

Inatsisartunut ilaasortaq Emanuel Nûko, Naleraq

Inatsisartunut ilaasortaq Kim Kielsen, Siumut

UKA 2021-imi ulloq 9. november siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Siku Blocki malillugu nunatsinni sanaartornermut atugassatut pilersitsisoqarsinnaanera, taamaaliornikkut nunatsinni illuliornerup aningaasatigut imminut nammassinnaasumik ingerlanissaanut ilapittuutinngorlugu periarfissiuunnissaa pillugu Naalakkersuisut UKA2022-mi nassuiaammik saqqummiusseqqullugit peqquneqarnissaat siunnersuutigineqarpoq.

Ilaatigut nunatta iluani illuliarilluarneqarsinnaasumik ajukkunnangilluinnartumik qarmasisiamik suliaqarluni nassaartoqareeraluartoq ukiorpassuarni nunani allaniit atortussaannavinnik atortoqartarsimasoq, ilaatigut siunnersuuteqartumit tunngavilersuutigineqarput.

Siunnersuutip Inatsisartunit siullermeerneqarnera

Siunnersuuteqartumit allatut iluseqarnissaanik kissaateqarfigineqaraluartoq siunnersuut pineqartoq siullermeerneqarnerani tigulluarneqarpoq.

Naalackersuisut akissuteqarnerminni allannguutissatut siunnersuut tulliuuttoq saqqummiuppaat:

”Najukkani sanaartornermut atortunik tunisassiornissamut piumasaqaatinik, UKA2022-mi saqqummiunneqartussanik suliaqarnissamut Naalackersuisut peqquneqarnissaannik Inatsisartuni aalajangiiffigisassatut siunnersuut. Piumasaqaatit Inatsisartunut agguaanneqassapput, kiisalu tamanut ammasumik saqqummiunneqassapput aammalu illuliortiternermi sanaartornermilu suliaqartunut attuumassutilinnut, kommuninut aamma ilinriarfinnut attuumassutilinnut agguaanneqassallutik.”

Tulliuuttumi Siumut allannguutissatut siunnersuummik saqqummiussaqaassamaarpoq:

”Nunatta pissarititai atorlugit siunissami sanaartoriaatsit qanoq ittut ineriartortinneqarsinnaanerit pillugu nassuiaasiornissamik, tassungalu atatillugu inatsisitigut aporfusinnaasunik qulaajaanissamik, Naalackersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UPA2022-mi saqqummiunneqassaaq suliarineralu Sulisitsisut suleqatigalugit ingerlanneqassalluni.”

Immikkoortup aappasaaneerneqannginnerani Sanaartornermut Ataatsimiititaliamit suliarineqartussanngortinneqarpoq.

Ataatsimiititaliap siunnersuummik suliarinninnera

Siunnersuummit siunertarineqartoq Inatsisartunit nalinginnaasumik tapersorneqarpoq. Nunami maani najukkami tunisassiomerup kalaallit nunaanneersunillu atorluanaanissap siuarsarneqarnissaa annertuumik soqutigineqarpoq. Suliffissaqarnermut, nunatta avataaniit nioqqutissanik tikisitsinermut annikillisaatitut aningaasatigullu ataavartussanik aaqqiinertut isigineqarpoq. Nunap iluani inissianik sanaartornermi Siku Blocki atorlugu sivirusumik atasinnaasunik, init iluini silaannarissunik annikitsumillu nukissamik atuiiffusinnaassuseqarnissaat qularutissaanngitsumik amerlasuutigut pitsaaqutitut isigineqarpoq. Peqatigitillugu tunisassiat ataasiakkaanut tunngassutillit pineqartillugit siunnersuutip Inatsisartunit suliarineqartariaqanngitsoq nalinginnaasumik isumaqarfigineqarpoq, aningaasatigut sanaartugassallu ataavarsinnaasut suliarineqarnerilu aningaasaqarnikkut angusaqarfiulluartumik imminullu akilersinnaasumik sanariaatsillu ineriartortinnissaannut killilersuisoqarnissaani piumasaqaatit piler-sinniarneqarnerat sammisariaqartoq, soorluttaaq inatsisinut tunngassuteqartut sinaakkuser-suinermi piumasaqaatigineqartussat nalimmassarneqarnissaat pingaaruteqartutut isigineqartoq.

Siuliini oqaatigineqareersutut, Siku Blockimut kisiat pinnagu tunisassiortoqarnissaa sanaartoriaatsillu siammasinnerunissaa pillugu Siumut allannguutissatut siunnersuuteqassamaarpoq.

Kalaallit nunaanneersunik piffinni ineriartortitsinermi, sanaartornermi akit appasinnerpaaf-fianiitinnissaasa anguneqarnissaa pingaartinneqartoq Siumumit aamma isumaqarfigineqarpoq. Aalajangiiffigisassatut siunnersuummut allannguutissatut siunnersuummik saqqummiussinermik atatillugu Inatsisartut Suleriaasianni aalajangiiffigisassatut siunnersuutinut allannguutissatut siunnersuuteqartarnermut malittarisassat innersuussutigineqarput. Aalajangiiffigisassatut siunnersuummut allannguutissatut siunnersuutit oqaatsit illugit atorlugit allanneqassasut tassani allaqqavoq. Uani pisumi taamaattoqanngimmat ataatsimiititaliap inassuteqarnermini allannguutissatut siunnersuut isummerfiginissaanut ataatsimiititaliaq periarfissaqarsimanngilaq.

Tassunga atatillugu Sikublock pillugu ataavartumik eqqumaffigineqartuarneranut Naalakkersuisut paasinnissimanagerat akuersaernerallu ataatsimiititaliamit maluginiarneqarpoq. Peqatigitilluguli Sikublocki atorlugu sanaartorerup aallartinneqarnissaanut ammaassinissamut, aalajangersimasunik sulii unammillernartunik qulaajagassaqartoq Naalakkersuisut isumaqarput. Peqatigisaanillu sanaartornermut inatsisini piumasaqaatinik malittarisassaqarmat Naalakkersuisunit eqqumaffigeqquneqarpoq. Naalakkersuisut nassuiaat ”Kalaallit sanaartornermi ator-tussiat” aamma nalunaarussiaq ”Kalaallit Nunaanni illut silataanni iikkanik qarmakkanik misissuineq” 2019-imi upernaakkut ataatsimiinnermi Inatsisartunut agguanneqartoq innersuussutigineqarpoq. Taakkua innersuussutigalugit Naalakkersuisut isumaqarput, nunatsinni sanaartortut namminneq ingerlatsisinnaagaluartut. Peqatigitillugu pisortat sinaakkutit suliiassarigaat, inuussutissarsiortullu namminersortut ineriartortitsissasut sanaartugassanillu pilersitsissasut Naalakkersuisunit isumaqarfigineqarpoq.

Inaarutaasumik, nunatsinni tunisassiornermik misilittagaasunik nalunaarsuiffimmik, misilittak-kallu taakkua tunngavigalugit sanaartukkat atasinnaassuseqarlutillu akilersinnaassuseqar-neranut tunngassutillit aalajangiinermi tunngavigineqartussanik misissuineramik Naalakkersuisunit aallartitsisoqarnissaa anguniarneqarpoq.

Suliami pineqartumi uani sanaartugassamut ataasiinnarmut tunngatitsinani sanaartornermut atortussanut sanaartoriaatsinullu ataavartussanut allanut sammitinneqartariaqartoq Inatsisartuni siunnersuutip siullermeerlugu suliarineqarnerani isumaqartoqarnera tapersersorneqartoq ataatsimiititaliap paasivaa ataatsimiititaliamillu isumaqatigiittumit tamanna tapersersorneqarpoq.


Siunnersuutip aningaasaqarnikkut allaffissornikkullu kingunerisassai

Pisortanut, inuussutissarsiortunut namminersortunut imaluunniit innuttaasunut aningaasatigut allaffissornikkut kingunerisassai pillugit siunnersuuteqartumit naatsorsuutigineqartunut ataatsimiititaliaq ilanngussassaqqanngilaq.

Ataatsimiititaliap inassuteqaatai:

Naalakkersuisut allannguutissatut siunnersuutaat **akuerineqassasoq ataatsimiititaliamit isumaqatigiittumit** inassutigineqarpoq.


Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.




Kristian Jeremiassen
Siulittaasoq



Anders Olsen
Siulittaasoq tullia



Charlotte Pike



Emanuel Nuko

Kim Kielsen